



NY FILOHAN'NY REPOBLIKA

ANTONY : Fanamafisana sy fanomezana torolalana ny fanofanana teknika sy arak'asa mba hanamoràna ny fampananan'asa eto Madagasikara

Andriamatoa PRAIMINISTRA, LEHIBEN'NY GOVERNEMANTA,
Ramatoa sy Andriamatoa MINISITRA isany ,
Andriamatoa SEKRETERAM-PANJAKANA isany,
Andriamatoa MINISITRA LEFITRA,

Efatra amby enimpolo isan-jaton'ny mponina (64%) eto Madagasikara dia latsaky ny 25 taona avokoa. Anisan'ny fanoitra lehibe, indrindra amin'ny fampandrosoana ny firenena ny fametrahana paik'ady ho entina hampiroborobo ireo ankizy sy tanorantsika. Ary amin'ny alalan'ny fametrahana rafi-pampianarana manara-penitra sy fiofanana ara-teknika ary arak'asa no hanatanterahana izany. **Didintsiaka ny manampy sy manohana ny tanora Malagasy mba ho mpitantsehatra sy mpandray anjara feno amin'ny fampandrosoana ny firenena izy ireo.**

Izany no maha zava-dehibe ny fampianarana, ary isan'izany indrindra ny fampianarana ara-teknika sy ny fanofanana arak'asa. **Mifototra amin'izany ny Velirano faha-efatra mikasika ny "Fanabeazana ho an'ny rehetra"** sy ny Velirano faha-enina mikatsaka ny **"Asa mendrika ho an'ny rehetra"**.

Harena lehibe indrindra ho an'ny firenena, tokony ho trandrahana sy hampiroboroboina, ny tanora. **Maro amin'izy ireo anefa no misedra fahasahiranana amin'ny fiainana noho ny tsy fananana asa.** Mampanano-sarotra azy ireo ny mahita asa noho ny antony maro : eo ny tsy fananana mari-pahaizana mihitsy na fananana ny Bakalôrea fotsiny saingy noho ny tsy fananan'ny ray aman-dreny ny hoenti-manana dia tsy afaka manohy fianarana eny amin'ny ambaratonga ambony, eo ihany koa ireo tanora maniry ny hihary saingy tsy manana traik'efa ho entina manangana orinasa.

Ankoatra ny tanora dia misy ihany koa ireo vehivavy mitondra tena, mameleona tokantrano ary tsy misy asa raikitra noho ny antony maro samihafa.

Eo ihany koa ireo **olona manana fahasembanana izay sahirana mahita asa noho izany fahasembanany izany.**

Tsy maintsy mahita vahaolana ho fanampiana azy ireo ny fitondram-panjakana. Ary hatao laharam-pahamehana ny fametrahana paik'ady azo tanterahina haingana sy mitondra vokatra azo tsapain-tanana haingana ho fampiakarana ny fari-pahaizana na ara-teknika na arapiofanana, ho an'ireo tanora, hahafahan'izy ireo miditra eo amin'ny sehatry ny asa.

Ny lalan-tsaina entintsika amin'izany dia ny tokony hahafahan'ireo tanora, vehivavy sy olona manana fahasembanana mianatra asa.

Asa izay tokony mifanaraka amin'ny filàn'ny firenena. Ny olom-pirenena iray dia manana adidy amin'ny fampandrosoana ny firenena ary tokony hitondra ny anjara birikiny amin'izany. **Manam-pahaizana sy manan-talenta ny Malagasy ary tsy tokony hisy intsony ny olom-pirenena vesatra na ho an'ny fianakaviana, na ho an'ny fiaraha-monina na ho an'ny firenena.**

Ny fanatsarana ny paikadim-pampandrosoana amin'ny alalan'ny fampiroboroboana ny fampianarana ara-teknika sy ny fanofanana arak'asa dia mitana anjara toerana lehibe ao anatin'ny «Plan Emergence de Madagascar» sy ny drafi-panorenantsika.

Lafiny efatra no ifotoran'ny vina napetraka mba hanatrarana ny famahana ny olan'ny tsy fananana asa eto Madagasikara :

1. **Fampiroborobona ny fampianarana ara-teknika sy fanofanana arak'asa manaraka ny kalitao,** ho an'ny tanora fa indrindra ny vehivavy sy ny olona manana fahasembanana mifanaraka amin'ny fihariana, mifototra amin'ny filàn'ny tsenan'ny asa eo anivon'ny Faritra ary eo anivon'ny firenena manontolo ;
2. **Fanomezana fanofanana arak'asa manaraka ny fenitra** ho an'ny olona rehetra ivelan'ny seha-pampianarana, indrindra ireo tanora tsy an'asa mba hahafahany mioitra hanatsara ny fari-piaianana ;
3. **Famolavolana lasi-panofanana mifanaraka amin'ny tsenan'ny asa**
4. **Fampifanarahana ny fanofanana izay omen'ny toeram-pampianarana sy harahin'ny mpiofana amin'ny filàn'ny firenena.** Ao anatin'izany ohatra ny fanomezana fampiofanana an'ireo tanora te hanao asa toy ny mpanao trano (maçon), mpanao volo (coiffeur), mpanao mofo (boulanger), mpahandro (cuisinier), mpanamboatra fiara (mécanicien) na ihany koa asa eo amin'ny sehatry ny fambolena sy fiompiana.

Araka izany dia azo tsinjaraina lafiny telo miavaka tsara ireo drafi-pampandrosoana izay ho tanterahina :

Eo amin'ny lafiny fisitrahaha: Mba hisian'ny fitoviana eo amin'ny faritra amin'ny fahafahan'ny rehetra misitraka ny fanofanana arak'asa dia ireto ny tanjona tsy maintsy tratrarinina :

- Tohizana ny fanorenana sy fanokafana ireo iwotoeram-panofanana manara-penitra **ANY AMIN'NY FARITANY ENINA eto Madagasikara** (eny anivon'ireo Renivohi-paritany) mba hahafahan'ny tanora manana asa mendrika sy mahavelona;
- Hamafisina ny fiaraha-miasa amin'ireo ivo-toeram-panofanana tsy miankina ;
- Tohizana ary hohatsaraina ny fampiofanana ny asa fototra (apprentissage aux métiers de base) ;
- Hampiroboroboina ny fiaraha-miasa amin'ny orinasa tsy miankina mba hahafahan'ireo mpiofana mianatra asa na manao « stage » sy mandray

tambiny na « indemnités de stage » ahafahan’izy ireo manatevina ny fahaiza-manao sy misehatra avy hatrany amin’ny sehatr’asa nosafidiany.

- Hamporishina ny fiofanana arak’asa ho an’ireo mponina mavitrika (capital humain) ka ho afaka hampiasa tena na hisaninana amin’ny sehatry ny asa ireo voaofana.
- Ho an’ireo mpianatra voaofana ka maniry ny hiasa-tena, dia hosokafana ho azy ireo ny fiantsoana tsenam-panjakana ho fanatanterahana ny asa entina hampitaovana ny tetikasam-panjakana toy ny : fanjairana ny aroakanjo (tablier, blouse) ny mpampianatra, ny mpianatra, ny mpitsabo mpanampy, ny fanjairana sainam-pirenena

Eo amin’ny lafiny kalitao

Mba hampisy ny fifandanjana eo amin’ny sehatry ny asa sy ny sehatry ny fampiofanana dia tokony apetraka ny fiaraha-miasa amin’ny sehatra tsy miankina na eto an-toerana na any ivelany ary ihany koa ny fiaraha-miasa amin’ireo ivotoeram-piofanana any ivelany mba hahatongavan’ireo matihanina mampiofana ny tanorantsika. Ohatra amin’izany ny « Compagnon du devoir. »

Ny tanjona dia ny hanatsaràna hatrany ny kalitaon’ny fampiofanana eto Madagasikara.

Eo amin’ny lafiny fitantanana (Gouvernance)

Ilaina ny fampandraisana anjara ny any ifotony amin’ny fampandrosoana ara-toekarena amin’ny alalan’ny fananan’ny mpiofana avy ao an-toerana asa mendrika sy mahavelona.

Marihana fa efa marobe ireo tetikasa an-dalam-panatanterahana manerana ny Nosy saingy tokony hafainganina izany.

Anisan’ny fanamby lehibe atrehantsika ny fanofanana ny tanora Malagasy sy ny fanomezana asa azy ireo. Ilaina dia ilaina noho izany ny ffanomezan-tanana eo amin’ny Minisitera rehetra araka ny andraikitra nankinina amin’izy ireo avy sy ny fiaraha-miasan’ny sehatra rehetra ary koa amin’ny mpiara-miombon’antoka.

Tsongaina manokana ianareo Minisitry ny Fampianarana Teknika sy ny Fanofanana arak’Asa, Minisitry ny asa tanana sy ny haitao izay miandraikitra ny fampiofanana, Minisitry ny Serasera sy ny Kolontsaina sy ny Minisitry ny Fambolena sy ny Fiompiana, ary ianao Ramatoa Minisitry ny Asa, ny Fampananana asa, ny asam-panjakàna ary ny Lalàna Sosialy.

Andriamatoa Praiminisitra, Ramatoa sy Andriamatoa Minisitra mpikambana ao amin'ny Governemanta, fantatry ny rehetra ireo fanamby ireo ary mazava ny tanjontsika, nefy ny fotoana manam-petra. Manantena anareo aho mba handray ny andraikitra tandrify anareo ary mba hahalavorary ny fampianarana ara-teknika sy fanofanana arak'asa ka ho isan'ny andrin'ny fampandrosoana haingana an'i Madagasikara.

Antananarivo, faha 18 may 2022

Ny Filohan'ny Repoblika
Andry Rajoelina



TATITRY NY FILANKEVITRY NY MINISITRA

Alarobia 18 may 2022 – Lapam-panjakana Iavoloha

Notanterahina androany ny Filankevitry ny Minisitra izay notarihin'ny Filoham-pirenena Andry Rajoelina ary nahitana ny Praiminisitra sy ireo Minisitra isan-tokony.

I- FAMPITANA AM-BAVA

MINISITERAN'NY TOEKARENA SY NY FITANTANAM-BOLA

Nankatoavina ny fanafoanan-ketra amin'ny fanafarana fonosana miisa 11 ahitana fitaovana, ho an'ny ivontoeram-pitsaboana **LE BON SAMARITAIN**, izay misehatra sy miasa ho an'ny vahoaka sahirana sy marefo.

MINISITERAN'NY FILAMINAM-BAHOAKA

Nankatoavina ny fandaharan'asa-panatanterahana ireo « Nouveaux projets d'Emergence » an'ity Minisitera ity ho an'ny fahazoana fitaovam-pitaterana na « matériels roulants ».

Ireo fitaovam-pitaterana ireo dia natokana ho an'ireo fitalevam-parity ny Filaminam-bahoaka ao Miandrivazo - Belo Tsiribihina - Manja - Morafenobe - Maintirano - Farafangana - Ampanihy - Morombe - Betroka - Antsalova - Mahabo - Ambatofinandrahana-Andilamena - Ankazoabo - Beroroha - Bealanana - Tanambao Manampotsy - Morondava - Maevatanàna - Toliary - Tsiroanomandidy

Nankatoavina ireo fandaharan'asam-panatanterahana ireo « Nouveaux Projets d'Emergence » an'ity minisitera ity ho an'ny fahazoana fitaovam-pitaterana (matériels roulants) mba ahafahana mampandeha sy mampiodina ireo kaomisarian'ny Filaminam-bahoaka, araka ny fampanantenana nataon'ny Filohan'ny Repoblika, dia ireo kaomisaria any Ankazobe - Benenitra - Mandritsara - Ikongo - Tsaratanàna ary Antsiranana.

MINISITERAN'NY TANORA SY NY FANATANJAHANTENA

Nankatoavina sy nomena alalana ny fanorenana kianja mitafo mahazaka olona 4 000 isa ao Mahajanga, eo amin'ny ampanhan'ny arabe anelanelan'ny toeram-panorenana sy ny Lycée Philibert TSIRANANA, sy ny fanomezana ireo fotodraftrasa fanorerana ho an'ny Fikambanana « Tennis Club de Mahajanga ».

Ny fanorenana io kianja mitafo ahitana toerana 4000 isa io eo amin'ilay ampanhan-dalana voakasiky ny tetikasa, mifanaraka amin'ny draftra nohamarinin'ny mpitantana ny tetikasa sy ny fanakatonana azy vonjimaika, dia hiantoka ny fiarovana ny toeram-panorenana ary koa ny fanomezana an'ny TCM ireo kianja fanaovana tenisy vaovao sy ny trano vaovao fanonerana

MINISITERAN'NY FAMBOLENA SY NY FIOMPIANA

Nankatoavina ny handraisan'ny Fanjakana an-tanana ny hetra tambatra amin'ny fanafarana fitaovana sy fampitaovana nataon'ny « Agence de Coopération Internationale (JICA) ho an'ny Tetikasa PAPRIZ III.

Nankatoavina ny handraisan'ny Fanjakana an-tanana ny hetra tambatra amin'ny fanafarana fitaovana sy fampitaovana ary kojakoja fanaovana fitiliana an'ny « Laboratoire National de Diagnostic Vétérinaire » (LNDV).

Ny « Laboratoire National de Diagnostic Vétérinaire », sampan-draharaha iray eo anivon'ny Minisiteran'ny Fambolena sy ny Fiompiana, dia misahana ny fitiliana ny aretin'ny biby eto amin'ny firenena. Izy io dia nisitraka ny Tetikasa « MAG 5028 : Developping food safety laboratory capabilities », mandritra ny 2022-2023, izay mikendry ny hanamafisana ny fahaiza-manaon'io ivo-pitiliana io amin'ny fikarohana ireo sisam-panafodim-biby any anaty ny sakafo, mba hiantohana ny fiarovana arapahadiovana.

MINISITERAN'NY FAMBOLENA SY NY FIOMPIANA + MINISITERAN'NY FANAJARIANA NY TANY SY NY FANANAN-TANY + MINISTERAN'NY FAMPIROBOROBOANA NY INDOSTRIA, NY VAROTRA SY NY FANJIFANA

Nankatoavina ny hikarakarana ny Fihaonambem-pirenena momba ny fambolena sy fiompiana, ny 16,17 ary 18 jona 2022 ao amin'ny Centre de Conférence Internationale (CCI) Ivato.

Ao anatin'ny tanjona lehibe ho fampiroboroboana ny fampiasam-bola eo amin'ny sehatry ny Agri-business, io Fihaonambem-pirenena io dia mikendry ny :

- Hampifandray ireo tompon-tany (olona na fikambanana) amin'ireo mpampiasa vola eto an-toerana
- Hamolavola sy hametraka ireo tetikasa fampiasam-bola ho an'ny tany tsirairay efa fantatra ary indrindra ny fampivondronana ara-pambolena amin'ny tanimpanjakana ;
- Hamorona asa, indrindra ho an'ny tanora, amin'ny alalan'ny fampiharana ny rafitra « Titra maitso »

Hisy karazany efatra ireo mpandray anjara amin'io fihaonambem-pirenene io : ireo mpandrahahara ara-toekarena, ireo tompon-tany na ireo mpitarika tetikasa, ireo mpividy ny vokatra ary ireo mpamokatra na vondrona mpamokatra.

MINISITERAN'NY FAMPIROBOROBOANA SY FANOVARA NY HAITAO ARA-KAJY MIRINDRA, NY PAOSITRA SY NY FIFANDRAISAN-DAVITRA

Nankatoavina ny fampitana am-bava momba ny fanaovana maoderina ny Paositra Malagasy sy ny fananganana bankin'ny Paositra.

Izany dia misanandrify amin'ny Velirano faha 11 nataon'ny Filohan'ny Repoblika, ny haha maoderina an'i Madagasikara, amin'ny fanomezana ainga vaovao ny tontolo ara-tsosialy sy ara-toekarena sy ny fomba fitantanana ny firenena.

Ho fanarahan-dalana, ary indrindra andaniny, mba hampaharitra ny fandaharan'asan'ny Fanjakana izay mifototra amin'ny karatra e-Poketra, sy ankilany, hanamarinana ny rafitra fiasa ara-drafitra sy ny fanitarana ny Paositra Malagasy, ho fiantohana vokatra ara-toekarena sy ara-tsosialy ambony indrindra, amin'ny lafiny laza

indrindra indrindra, dia tsy azo ihodivirana intsony ankehitriny ny fametrahana fanovàna eo anivon'ny Paositra.

Ny Paositra Malagasy ankehitriny dia homena endrika sy rafitra ara-dalàna, hiantoka ny fahafahany manatanteraka ireo asa fototra napetraka aminy. Hisy ny fananganana orinasa hiankina aminy, manaraka ny fenitra takian'ny lalàna sy ny fitsipika manan-kery. Io orinasa io dia hanatanteraka ny asana banky.

SEKRETARIAM-PANJAKANA MIADIDY NY ZANDARIMARIAM-PIRENENA

Nankatoavina ny fahazoana fitaovalam-pitaterana ho an'ny Zandarimariam-pirenena (fiara pick-up miisa 10).

Ireo vondron'ny Zandarimaria misandrahaka any anivon'ny faritra 23 no hisitraka ireo fiara ireo, izay hozaraina eny anivon'ireo « Centres Spéciaux d'Aguerrissement Opérationnel » (CSAO) miisa 08 avy natsangana vao haingana. Hahazo ny anjarany amin'izany ihany koa ireo Vondrona fototra any amin'ireo farity ny Zandarimariam-pirenena.

II- FANKATOAVANA DIDIM-PANJAKANA

MINISITERAN'NY TOEKARENA SY NY FITANTANAM-BOLA

Noraesina ny didim-panjakana manendry ny « Administrateur non-exécutif » an'ny Banky Foiben'i Madagasikara avy amin'ny Antenimieran-doholona.

MINISITERAN'NY TOEKARENA SY NY FITANTANAM-BOLA + MINISITERAN'NY FAHASALAMAM-BAHOAKA

Nankatoavina ny volavolan-dalàna manome alalana ny fankatoavana ny fifanarahana fampindramam-bola mifandraika amin'ny famatsiana vola ny tetikasa fiomanana amin'ny valan'aretina sy fanomezana tolotra fahasalamana fototra, izay nifanaovan'ny Repoblikan'i Madagasikara sy ny « Association Internationale de Développement » (IDA) tamin'ny 18 aprily 2022.

Ho fiatrehana ny valan'aretina toy ny Covid-19 sy ny fihanaky ny areti-mifindra, ny Governemanta malagasy dia nahazo fanohanana ara-bola avy amin'ny « Association Internationale de Développement », tamin'ny alalan'ny famatsiam-bola mitentina 72 000 000 DTS (fanomezana ny 36 000 000 DTS ary fampindramam-bola ny 36 000 000 DTS), izany hoe 100 800 000 USD (fanomezana ny 50 400 000 USD ary fampindramam-bola ny 50 400 000 USD).

Tanjon'izany ny hanamasina ny fahaiza-manao eo amin'ny samy sehatra mba hisian'ny fiaraha-miasa eo amin'ny fanaraha-maso ireo aretina sy hiatrehana ireo valan'aretina ary hanatsaràna ny fampiasàna ireo tolotra ara-pahasalamana tena ilaina.

III- FANENDRENA MPIASAM-PANJAKANA AMBONY

MINISITERAN'NY FANAJARIANA NY TANY NY SAMPANDRAHARAHA NY FANANAN-TANY

Noraisina ny didim-panjakana manafoana ny didim-panjakana laharana faha 2021-968 tamin'ny 29 septambra 2021 ary manendry an'**Atoa. TANDRA Hyacinth Hermann**, ho "Directeur de l'Audit Interne" eo anivon'ny Minisiteran'ny Fanajariana ny Tany sy ny Sampandraharan'ny Fananan-tany

MINISITERAN'NY TOEKARENA SY NY FITANTANAM-BOLA

Noraisina ny didim-panjakana manendry an'**Atoa. RABARIVELO Sedera Tianamitandrina**, ho « Directeur des Systèmes d'Information auprès de l'Autorité de Régulation des Marchés Publics » eo anivon'ny Minisiteran'ny Toekarena sy ny Fitantanam-bola..

MINISITERAN'NY ATITANY SY NY FITSINJARAM-PAHEFANA

Noraisina ny didim-panjakana manafoana ny didim-panjakana laharana faha 2015-1427 tamin'ny 24 oktobra 2015 ary manendry an-**dRamatoa DANAHY Dama Flavelle**, ho Sekretera Jeneraly eo anivon'ny Prefektioran'i Toamasina.

MINISITERAN'NY FAMPIROBOROBOANA NY INDOSTRIA, NY VAROTRA SY NY FANJIFANA

Noraisina ny didim-panjakana manendry **an'Atoa RANDRIAMILISON Tsimbazafy Yvon**, ho « Directeur de l'Audit Interne et de la Lutte Anti-Corruption » eo anivon'ny Minisiteran'ny Fampiroboroboana ny Indostria, ny Varotra sy ny Fanjifana

MINISITERAN'NY FIZAHANTANY

- Noraisina ny didim-panjakana manendry **an'Atoa. BARIVELO Danny**, ho « Directeur de la Valorisation des Produits Touristiques » eo anivon'ny Minisiteran'ny Fizahantany.
- Noraisina ny didim-panjakana manendry **an'Atoa. LAHIANDRY Manampisoa**, ho Tale Iraisam-parity ny Fizahantany any Anosy - Androy eo anivon'ny Minisiteran'ny Fizahantany.

MINISITERAN'NY FITATERANA SY NY FAMANTARANA NY TOETRANDRO

- Noraisina ny didim-panjakana manafoana ny didim-panjakana laharana faha 2021-1046 tamin'ny 06 oktobra 2021 ary manendry **an-dRamatoa FIDIHELINOSY Vonimalalaniaaina Hasina**, ho « Directeur de la Planification et du Suivi Evaluation » eo anivon'ny Minisiteran'ny Fitaterana sy ny Famatarana ny Toetrandro
- Noraisina ny didim-panjakana manafoana ny didim-panjakana laharana faha 2021-1087 tamin'ny 13 oktobra 2021 ary manendry **an'Atoa. RANDRIANASOLO Jean Patrick**, ho « Directeur Général des Transports Maritime, Fluvial et Aérien » eo anivon'ny Minisiteran'ny Fitaterana sy ny Famatarana ny Toetrandro.
- Noraisina ny didim-panjakana manendry **an-dRamatoa RANDRIANARIVO Iravaka Helitiana**, ho « Directeur des Transports Ferroviaires » eo anivon'ny Minisiteran'ny Fitaterana sy ny Famatarana ny Toetrandro.

MINISITERAN'NY ASA VAVENTY

- Noraisina ny didim-panjakana manaoana ny didim-panjakana laharana faha 2021-1238 tamin'ny 08 desambra 2021 ary manendry an'**Atoa. SOLOFONIAINA Nomenjanahary**, ho Talem-parity ny Minisiteran'ny Asa Vaventy ao Amoron'i Mania
- Noraisina ny didim-panjakana manendry an'**Atoa. RANAIVOSOA Peterson Leonardo**, ho « Directeur des Etudes et de l'Evaluation Environnementale » eo anivon'ny Minisiteran'ny Asa Vaventy

MINISITERAN'NY FAMBOLENA SY NY FIOMPIANA

- Noraisina ny didim-panjakana manaoana ny didim-panjakana laharana faha 2021-094 tamin'ny 27 janoary 2021 ary manendry an'**Atoa. KOFOKY Christian Félix**, Talem-parity ny Famboleña sy ny Fiompiana ao Bongolava
- Noraisina ny didim-panjakana manaoana ny didim-panjakana laharana faha 2019-857 tamin'ny 24 aprily 2019 ary manendry an-**dRamatoa RAKOTOARIZAFY Anjara Tongasoa Mirana**, ho Talem-paritryny Famboleña sy Fiompiana ao Betsiboka.

MINISITERAN'NY ASA TANANA SY NY HAITAO

Noraisina ny didim-panjakana manendry an'**Atoa. RANDRIANASOLO Didier France**, ho Talem-parity ny Asa Tanana sy ny Haitao ao Vatovavy

SEKRETARIAM-PANJAKANA MIADIDY NY ZANDARIMARIAM-PIRENENA

Noraisina ny didim-panjakana manaoana ny didim-panjakana laharana faha 2019-1976 tamin'ny 16 oktobra 2019 ary manendry ny **Général de Brigade RALAIVAONARY Andrianoasy D'y la Paix**, ho « Directeur de la Gestion du Personnel » eo anivon'ny Kaomandin'ny Zandarimariam-pirenena

IV- FANAFOANANA

MINISITERAN'NY FANABEAZAM-PIRENENA

Noraisina ny didim-panjakana manaoana ny didim-panjakana laharana faha 2021-585 tamin'ny 26 may 2021 nanendry ny « Directeur du Centre Régional de Formation pour l'Océan Indien » eo anivon'ny Minisiteran'ny Fanabeazam-pirenena.

Natao ny 18 may 2022

**Ny Fitaleavan'ny Serasera sy ny Fifandraisana amin'ny Daholobe
eo anivon'ny Fiadidiana ny Repoblika**